

Jon Manénkir Kumwimp Pas Mekia Akwapnámp Kar

Jon te Jisas éréképá yárákimp éntér-sámpramp arop ou mekamp ankwapono. Mao taun Efesus mek yaká yakea, wae mér pourouria, Jisas pokámp yopwar 60 yopwar niamp arake fek mámá pas má kumwimpon.

Mao wanánko, arop ankwap fáráká kwekárrá sérrá, “Apárokamp aropamp pourou te kwataeria, kwatae ninik am mek yak námpara, Jisas te Kwaromp Tárápara, apárokamp arop pourou kare sámp naenámp pourou mono.” Aerá sénapantá, mao te koumteouráp aropamp ninik fwapokwapi pap naeria, mámá pas kumwimpon.

Tá ankwap kar te ará: ‘Kwar te ponankor aropan nouroup námpara, yumo kor ankár ponankor aropan nounouroup kip’rá sénámpon.

Yiki yak sánk konámp kar

¹ Mámá yiki yak sánk konámp kar te me koum sik yakámpan yino wae maomp kar wa, tá yinomp yi kare fek man wae nke, tá yino man tokoreyakáprá, tá yinomp yae korao maomp pourouk wae sámp, maki námp kwamp, yino mámá kar farákáp konámpono. ☆ ² Am yiki yak konámpao érik koropeanánko yino waeman kare nke námpan, yumwan am yiki yaká yakáp mwanámp kar érik farákáp konámpon. Am yiki yak te wokwaek kar Naropwarént yakámpan maok,

☆ 1:1: Jo 1:1-2,4

oukoumwan te wae érik koropeanánko yino nke námpon. ☆ ³ Yino nkeaka wawinámp karan yumwan farákáp nánko, yumo kor má kar wariaka yinont ankár pourouráp ninik fek yakápria, nomo énéni Naropwar ntia maomp Táráp Jisas Kraisént ankár pourouráp ninik fek yakáp mwanámpon. ⁴ Yino mámá kar má kumwi námp te, nomp warákár te tokwae kari yak naenámpra námpono.

Nomo ankár wae fek paokop mwanám kar

⁵ Yino maomp Tárápao sérimp karan wawianámpan yino yumwan farákáp námp te ará: Kwar te ankár wae tokwaerápara, man te kirikip kánanke yak mono. ☆ ⁶ Táte nomo sérrá, ‘Ono Kraisént ankár pourouráp ninik nampono’rá sénámpao maok, nomo am ninikaok paokop moria, nomo kirikip mek paokop námp te, nomp kar te kwekárápara, nomo te kare kar ninikaok paokop mo i konámpon. ☆ ⁷ Táte Kwaro wae fek yak námpnámp taknámp nomo kor wae fek paokop námp te, nomo ankár pourouráp ninik fek nounourouprá yakáp nánko maok, Kwaromp Táráp Jisasomp yirirao nomp kwatae ninik ponankor yárari pwaránko, nomo yiki kor kwapwe yakáp i konámpon.

⁸ Táte nomo ‘Ono kwatae ninik te yak mono’rá sénámp te, nomoku támao kwekárá sénámpara, kare kar sér i konap ninik te nomp ninik mek yak mo námpon. ⁹ Aeno táte nomp kwatae ninik Kwarén érik sénánko te, Kwar te ‘Námoku tak

nanamp'rá séritenámp kar ták-pwar mono, yae-párák kare ninik fek nomp kwatae ninik ponankor torokorrá épéria nik mo, pwar nánko, nomp ninik yiki kukur kwapwe naenámpon. ¹⁰ Táte nomo sérrá, 'Ono te kwatae ninik moi nampono'rá sénámpao maok, nomo takrá sénámp kar támao 'Kwar te kwekár i konámp aropono'rá sénámp ni-ampon. Aenámpara, Kwaromp kar te nomp ninik mek te yak mono.

2

Krais nomwan yaewour i konámp kar

¹ Onomp tárápu * o! Ono ankár yumo kwatae niniki kwaponoria yiráp por má kar kumwi nampono. Aeno táte arop ankwap warko kwatae ninik fek akwap nánko te, nomwan yaewouranoria Kwarén sér i konámp arop Naropwar Kwarént yak námpon. Am te yae-párák kare arop Jisas Kraisono. ☆ ² Kwaro nomp kwatae ninik fek nomwan yonkwae pwarámp námp te, Jisas námoku térea nomp kwatae ninik tirá épéri námpon. Mao taki námp te, nomwan saráp yaewour naeria tére mono, má apár mekamp arop ponankor yaewour naeria sumpwi námpon. ☆

³ Nomwan Kwaro sénámp lo kar wawia mántwaok saráp paokop námp te, am támao nomo Kwarén mér karnámp yénkép námpon. ⁴ Aeno arop ankwap ankárankao 'Ono Kwar te wae mér nampono'rá sénámpao, Kwaromp lo karaok

* **2:1:** Jono 'Tárápu'rá sénámp te, mao kar farákáp nánko, wawia Kraisonámpok koropea Kristen yakápnas sios fákáreran sénámpon.

☆ **2:1:** Hi 9:24 ☆ **2:2:** Jo 1:29; 11:52; Ro 3:25

yarak monámp arop te kwekár námpara, kare kar sér i konap te maomp ninik mek yak mono.

✧ 5-6 Aeno arop ankwapao Kwaromp karwaok akwap námp te, mao tak námp támao nomwan yénképrá: Maomp Kwarén warákárnámp ninik te wae pwi kare yak námpon. Tá arop ankwapao ‘Ono Kwarént yak namp’rá sénámp te, ankár Kraiso yáraki námpnámp taknámp yarak nángo maok, mao Kwarént yak námp mér mwanámpon. ✧✧

‘Arop ankwapyaenápén nouroup námp te, Kwaromp wae fek yak námp’rá sénámp kar

⁷ Ononamp fárakap, ono yiráp por kumwinamp lo kar máte wourékam lo kar mono, épi lo kar wokwaek kar yumo sámpap támaono. Am épi lo te yumo wokwaek wawiap kar támaono. ✧ ⁸ Aeno am lo ono warko yiráp por kumwi namp máte, wourékam lo niampono. Nomo wae mér námpon: Má wourékam lo máte Krai námkuráp ninik mek yakriaka, yiráp ninik mek kor tére námpon. Am te apae riteanápe, kirikip te wae pwar naeria nángo, Kwaromp wae karerao koropá yak námpon. ✧

⁹ Táte arop ankwapao ‘Ono te Kwaromp wae fek yak nampono’rá sénámpao maok, Kristen ankwapyaenápén kokwarokria warákár mo námp te, mao oukoumwan kirikip mek yak námpono.

✧ ¹⁰ Aeno arop Kristen ankwapnápén warákár konámp te, mao te waeman wae fek yak námpara, apae ankankao man nánkáráp nángo sikirip

✧ 2:4: 1 Jo 1:6,8 ✧ 2:5-6: Jo 14:21,23; 1 Jo 4:12,17; 5:3 ✧ 2:5-6: Jo 13:15 ✧ 2:7: 2 Jo 5-6 ✧ 2:8: Jo 1:9; Ro 13:12 ✧ 2:9: 1 Jo 3:10,15; 4:20

naenámpanáp? ☆ 11 Tá Kristen ankwapyaenápén kokwarok i konámp arop te, kirikip mek yak námpón. Mao te kirikip mek yarak námpara, kirikipao yi nánkárápeyak nángo, mao te apae mwae-páraok akwap raerá mér mo i konámpón. ☆

12 Onomp tárápu o! Yumwan Kraisomp e kárákáre fek Kwaro yiráp kwatae ninik tirá épéri námpantá, yiráp por kumwi nampon. ☆

13 Naropwaryaenáp fákáre, yumo mámá arop wokwaek kar yakeanámpao, oukoumwan taki yak námp wae mér napon. Aenapantá ono yiráp por kor má kar má kumwi nampon. Menkou-tárápu, yumo waeman Satanén kwe-pwate napantá yumwan kor má kar má kumwi nampon.

14 Tárápu, yumo te Naropwar Kwarén waeman mér napantá, ono má kar kumwi nampon. Naropwaryaenáp fákáre, yumo kor mámá arop wokwaek kar yakeanámpao oukoumwan taki yak námp wae mér napantá, ono má kar má kumwi nampon. Menkou-tárápu, yumo te kárákáreria Kwaromp kar yiráp ninik mek yak nángo, Satanén waeman kwe-pwate napon. Aenapantá ono yiráp por mámá kar kumwi nampon.

Nomwan 'Apárokamp ninikan warákár kwapono'rá sénámp kar

15 Yumo te apárokamp ninikan warákárriaka apárokamp ankankan kor ponankor mént warákár mwanape. Arop ankwapao apárokamp ninikan warákárámp te Naropwarén te warákár mo i konámpón. ☆ 16 Apárokamp arop ponankor

☆ 2:10: Ro 14:13 ☆ 2:11: Jo 12:35 ☆ 2:12: 1 Ko 6:11 ☆ 2:15: Ro 8:7; Je 4:4

sámpá paokop i konap ninik te, námokuráp ninik mek poup kikiank i konap ninik, tá yi fek nkea kikianknap ninik, tá, námo nkwakwe make kokop namprianámp ninik, má ankank máte Naropwar Kwaronámpoknámp korop mono, apárokamp ninikono. ¹⁷ Mámá apár ntia am mek yaknámp kikiank ninik méntér pwar naenámp. Aeno arop Kwaromp kar wawia mántwaok yáarak námp te fwap yaká yak naenámp. ☆

Kraisomp kar kwe-pwar naenámp arop korop naenámp kar

¹⁸ Tárápu, oukoumwan te apár pwar naenámp yae wae wonae fikono. Yumo wokwaek te, 'Krais namponoria poupwekápnámp arop korop naean'rá sénap kar wae wawiapon. Táte wae oukoumwan kápae kare, Kraiso namponoria poupwekápnámp mwanap arop wae korop napon. Aenapara, nomo wae mér: Am te wae yae fae nángo napon. ☆ ¹⁹ Manénkir te am fárákap nomont yakápi napao maok, nomwan pwarará tukup tenapon. Am fárákap te kare kar nomp kare mono. Táte am fárákap nomp kareraoia te fwap nomont yakápnámp mwanapan maok, mao nomwan pwar napo, nomo wae mér: Am fárákap te nomp kare mono. ☆

²⁰ Aeno yumwan Kwaro waeman yiráp pourou mek Yiki Kor Spirit kwarákari námpara, yumo ponankor waeman mér kwapwe sámpá yakápnámp napon. ²¹ Aenapara, ono te yumwan, kare kar kar mér mo napon ninikria yiráp por má kar kumwi

mono. Yumo waeman kare kar kar méria, am kare kar karao kwekár kar sámp-pap mo i konámp te, yumo wae mér napantá, ono yiráp por māmá kar kumwi nampon.

²² Kwekár i konámp arop te wanono? Am arop ‘Jisas te Kraís mono’rá sénámp arop te támaono. Am arop te Naropwar Kwar ntia maomp Táráp younkwe sánk konámpara, Kraisen yopornámp aropono. ☆ ²³ Aropao Tárápan younkwe sánk námp te, Naropwarén kor younkwe sánk námp. Aropao Tárápan méria ninik mek sámp námp te, Naropwarén kor méria ninik mek sámp námp. ☆

Yiki Kor Spiritao nomwan kare kar karan yénknámp kar

²⁴ Yumo wokwaek wawiap kar ankár kárakáre fek niki-samp kip. Yumo am wokwaek wawiap kar am niki-samp napo te, Táráp ntiaka Naropwar yumont yaká yak nerepon. ²⁵ Kraiso nomwan sérinámp kar te ‘Yae-párak kare yiki yaká yakáp mwanapono’rá séri námp támaono. ☆

²⁶ Ono yiráp por kumwinámp kar máte yumwan poupwekáp naenámp aropamp ninikan érik farákarrá kumwi nampon. ²⁷ Aeno Kraiso náráp Yiki Kor Spirit yumwan kwarákarea pwar nánko, am yumont yak námpara, arop ankwapao yumwan Kwaromp ninikan yénkép naenámp tére yak mono. Am te apaerianápe, Yiki Kor Spiritao yumwan waeman kápae kare ankank farákáp námpara, yumo te ninik fae tákare mono. Am Yiki Kor Spiritamp kar te kwekár mono, kare

☆ **2:22:** Mt 10:32-33; 1 Jo 4:3; 2 Jo 7 ☆ **2:23:** Mt 10:32-33; Jo 5:23; 2 Jo 9 ☆ **2:25:** Jo 3:15; 6:40

sénámpon. Aenámpara, Spiritao yumwan yénkép námpnám্প taknámp, yumo ankár Kraiséén ninik mek fákaþea sámpá paokop kipo. ✧

²⁸ Onomp tárápu, yumo te ankár Kraiséén koumpá yakáp kipo. Tak napo maok, nánkár wakmwaek mao érik korop nángo, nomo man nkea pwaráþae mo, yae-párák kare kárákare fek warákárrá yakáp mwanámpon. ✧ ²⁹ Táte yumo Kraiséén, mao te yae-párák kare aroponoria mér nap kwamp te, yumo nke napo, arop ponankor yae-párák kare ninik fek paokop nap te, mao kor Kwaromp táráþunorá mér mwanapon. ✧

3

Nomo oukoumwan Kwaromp tárápu yakápnám্প kar

¹ Wakwe! Naropwaro námokuráp ninik fek yonkwae touwe kateria maok, nomwan ‘Onomp táráþuno’rá sénámpara, nomo te waeman kare kar Kwaromp táráþunon. Apárok maþekamp arop te Kwarén mér mo napara, taknámp nomwan kor mér mo napon. ✧ ² Ononamp fárákap, nomo oukoumwan te Kwaromp tárápu yakáp námpon. Aeno nánkár wakmwaek te mokoprá yakáp mwanámpaoean, am te nomo fwapia mér mo námpon. Aeno nomo wae mér námpon: Nánkár wakmwaek te Krai érik ék nángo, nomo wae mao karean nkea maok, nomo kor Krai námoku yak námp niamp taknámpi yakáp mwanámpon. ✧ ³ Arop ponankor Kraiséén yéþekrá yakáp i konap

✧ **2:27:** Jo 14:26 ✧ **2:28:** 1 Jo 4:17 ✧ **2:29:** 1 Jo 3:10 ✧ **3:1:** Jo 1:12-13; 16:3 ✧ **3:2:** 2 Ko 3:18; Fl 3:21

te, Kraiso yiki kare yak námpnám্প taknám্প am fárákapao kor námokuráp ninik fwapokwaprá yiki kare yakáp i konapon.

⁴ Kwatae ninik te ankár lo kar kwe-sinámpara, arop kwatae ninik fek yarak i konám্প te, Kwaromp lo kar ták-sinámpn. ⁵ Yumo te waeman mér napon: Krai te nomp kwatae ninik ti-akwap naeria, korop námpao maok, mao námoku kare te kwatae ninik yak mono. ☆ ⁶ Arop Kraisént koumpá yak námp te, mao te kwatae ninik fekamp ninikaok yarak mo i konámpon. Aeno arop ankwap námokuráp kwatae ninikaok yarak nánko te, nomo waeman wuri nkea mér námpon: Am arop te Kraiséen nke mo, tá Kraiséen mér mo námpon. ☆

⁷ Onomp tárápu o! Yumo fwapia mér kip: Arop ankwapao yumwan kwekárrá sér mwanape. Arop yae-párák kare ninik fek tére námp te, am arop te yae-párák kare arop Krai niampono. ☆

⁸ Wokwaek kar Satano kwatae ninik sámpámpara, arop kwatae ninik fek yak námp te, mao te Satanomp aropono. Kwaromp Táráp te Satanomp téreran kwatae papea kwe-pwar naeria érik ék námpon. ☆ ⁹ Arop ankwap Kwaromp táráp yoro námp te, kwatae ninikaok akwap mo i konámpon. Waeman Kwaromp ninikao am aropamp ninik mek yak nánko, Kwaro maomp Naropwar yak námpara, mao te warko kwatae ninikaok yarak mo i konámpon. ☆ ¹⁰ Aeno nomo wa mokop Kwaromp tárápaoean, tá wa Satanomp tárápaoean mér mwaria te, arop kwapwe kare ninik fek yarak

☆ **3:5:** 2 Ko 5:21; 1 Pi 2:22-24 ☆ **3:6:** Ro 6:1-2,14 ☆ **3:7:** 1 Jo 2:29 ☆ **3:8:** Jo 8:44 ☆ **3:9:** 1 Jo 5:18

nánko nkeaka, ‘Mao te Kwaromp tárápono’rá sér mwanámpon. Aeno arop kwatae ninik fek yáakria, maomp Kristen ankwapyaenápén warákár mo nánko te, mao te Kwaromp monorá mér mwanámpon.

Kristen ankwapyaenápén warákár konap ninik

¹¹ Yumo wokwaek te kar arakrá wawiapon: Nomo ankár nomp ankwapyaenápént nonopok nounouroup mwanámpon. ☆ ¹² Nomo te Kenoimp niamp ninik fek yakáp mwareano. Ken te Satanomp arop yakámpara maok, náráp nánaeran námoku sámp-wouroumpámpon. Am te apaeritea nánaeran sámp-wouroumpámpon? Nánaeramp ninik te yae-párák karenko, námokuráp ninik te kwatae námp kwamp yopor yonkwae pwarámpria sámp-wouroumpámpon. ☆

¹³ Ankwapyae fákáre, apárokamp arop yumwan, nke te mo karonoria yopora wae napo te, yumo am táman kokorokori kwapono. ☆ ¹⁴ Nomo ankwapyaenápén warákár námp kwamp te, am ninik táman mér mwanámpon, nomo waeman sumpwi mwanámp ninik te pwatea yiki yakáp mwanámp ninikaok yakáp námpon. Aeno arop Kristen ankwapyaenápén warákár mo námp te, am arop te sumpwi konap ninik fek yak námpon. ☆ ¹⁵ Arop ankwapnápén, námo nke namp fek yak te monoria youpoukwap námp te, waeman arop sámp-wouroump nap niamp námpon. Yumo te waeman mér napon: Arop ankwapan sámp-wouroumpnámpon arop te, mao te yiki yaká yak

☆ **3:11:** Jo 13:34-35 ☆ **3:12:** Stt 4:8 ☆ **3:13:** Mt 5:11-12; Jo 15:18-19 ☆ **3:14:** 1 Jo 2:11

naenámp kwapwe te sámp mono. ☆ 16 Jisas te nomwan yaewourria náráp pourouk touwe sámpámpon. Takimp ninik te nomwan arop yonkwae touwe konap ninikan yénkép námpon. Ae námp te, nomo Kristenara, nomo kor nomp Kristen ankwapyaenápén yaewourrá nomp pourouk touwe sámp mwanámpon. ☆ 17 Aeno arop ankwap apárokamp ankankrápao Kristen ankwapyaenápén nke nángo, ankank mo nángo, man yonkwae touwe moria ankank sánk mo námp te, mao te ‘Ono te Kwarompono’rá sénaeane. 18 Onomp tárápu o! Nomo nomp ankwapyaenápén párák kar fek saráp yonkwae touwe mwareano. Ankár am fárákan yonkwae touwe kareria ankár kwapwe kare ninik fek yaewour mwanámpon. ☆

‘Kwarén mérnáp arop te Kwaro nke námp fek apáp mono’rá sénámp kar

19-20 Nomo am arop yonkwae touwe mwanámp ninikaok paokop námp kwamp te, nomo wae mér námpon: Nomo te waeman am kare kar karwaok paokop námpon. Kwar námoku maok tokwae karara, kápae kare ankank wae námoku méri yak námpara, nomo te, wae yae-párák kare ninikaok namp nierá ninik tokwae kwapono. Kwaro waeman nke námpara, sánánkar yonkwae porokwe fek yakáp mwanámpon. 21 Ononamp fárákap, nomp ninik mek kwatae ninik yak námpará mo námp kwamp te, nomo Kwaro nke námp fek apáp moria, yae-párák kárákáre fek yakáp konámpono. 22 Nomo Kwaromp loaok tukupria, Kwaro warákár konámp

☆ 3:15: Mt 5:21-22 ☆ 3:16: Jo 13:1; 1 Te 2:8 ☆ 3:18: Lo 15:7; Je 2:15-16

ninikaok paokop námpara, nomo Kwarén apae ankank ‘Sápa’e’rá sénánko te, fwap sáp naerámpon. ☆ ²³ Kwaromp lo te ará: Nomo maomp Táráp Jisas Kraisen méria maok, mao nomwan séri námpnámptaknámpt nomo ankár nompt ankwapyaenápén nonopok nounouroup mwanámpon. ☆ ²⁴ Aeno táte arop ankwapao Kwaromp loaok saráp yarak námp te, mao te Kwarén koumpá yak nángo maok, Kwaro kor mént koumpá yak námpon. Kwaro nomwan Yiki Kor Spirit sáptari námpara, am Spiritao Kwaro nomont yak námp yénpék námpon. ☆

4

Spirit fákáreran yurukup mwanámpt kar

¹ Ononamp fákáre, kápa kare kwekár profet apárok má paokop napon. Aenapara, arop ponankor ‘Námo wae Kwaromp Spiritráp’rá sénánko te, tamak kare karonorá niniki kwapono. Yumo ankár, máte Kwaromp Spiritaoeane, tá ankwap spirit kwataeraoi kanrá fwapiá yurukup kipo. ☆ ² Yumo Kwaromp Yiki Kor Spirit yakápnapt arop te, arakrá sénapt aran wawia mér mwanapon: Arop ponankor ‘Jisas Krai te apárokamp arop kare arákari námpon’rá sénapt te, am arop fárákapt te Kwaromp Yiki Kor Spirit yakápnapt arop támaonono. ☆ ³ Arop ankwap fárákaptao ‘Jisas arop kare arákár moi námp’rá sénapt te, am arop fárákapt te ankwap spiritrápono. Am te Kwaromp Spiritráp mono. Am spirit te yumo wokwaek wawapo, Kraisen yopornámpt arop korop naenámponoriapt

☆ **3:22:** Mt 21:22 ☆ **3:23:** Jo 6:29; 13:34 ☆ **3:24:** Ro 8:9

☆ **4:1:** Mt 24:11 ☆ **4:2:** 1 Ko 12:3

te, oukoumwan wae apárok koropea yak námpon.

☆

⁴ Onomp tárápu o! Yumo te Kwarompara, kwekár i konap profet fákáreramp kar te waeman kwe-pwarari napon. Yiráp pourouk woukoupá yaknám Yiki Kor Spirit te apárokamp aropamp pourouk woukoupá yaknám spiritan kwe-pwar námpon. ⁵ Am arop fárákap te apárokamp aropara, am fárákapamp karao kuri apárokampono. Aenánko, apárokamp arop ankwap fárákap am fárákapamp kar táman wawi konapon. ☆ ⁶ Nomo te Kwarompara, arop Kwarén mér nám te, am arop te nomp kar wawi konámpon. Aeno arop Kwaromp firáp mo nám te, mao te nomp kar wa mo i konámpon. Aenapara, am taknap ninik táman maok, nomo nkea méria Yiki Kor Spiritao kar kare sér i konám mér, tá kwekár i konám spiritamp kar wawia mér mwanámpon. ☆

Kwaro nomwan nouroupnám kar

⁷ Onomp nouroup fákáre, nomo te ankár nonopok nounouroup saráp yakáp mwaro. Am te apae riteanápe, nounouroup i konap ninik te Kwaromp ninik támaono. Arop ankár ankwapan nouroup i konap ninikaok yarak nám te, Kwaromp aropara, mao te Kwaromp táráp támaono. ⁸ Kwar te am arop nouroup i konap ninik fi korara, aropao kor ankwapan nouroup mo nám te, Kwarén mér monám aropao námpon. ⁹ Kwar te Táráp ankárankamp karean maok, am Táráp apárok mapek sámp-kérépám te, nomwan Kraiso yiki yak ti-sáp nánko,

am yiki yak sámpenkria sámp-kérépámpon. Am takimp te, Kwaro nomwan aropomp kare námpan yénkép námpon. ¹⁰ Aropomp i konap ninik te apae nomomékir Kwarén aropompi námpanápe. Aropomp i konap ninik te Kwaromékir nomwantá aropompiaka náráp Táráp Kraisén sámp-kérép nánko, mao ékia, nomp kwatae ninik fek sumpwianánko, Kwaro am kwatae ninik warko ník mo, pwarará, érékép námpon.

¹¹ Ononamp fákáre, má ninik máte Kwaro nomwan nouroup námpan yénkép námpara, nomo kor taknámp ankár nonopok nounouroupa wae mwanámpon. ¹² Arop ankwap ankárankao Kwarén te nke mo kare námpao maok, nomo nomp Kristen ankwapyaenápen nouroup kare námp te, Kwaro nomont yak nánko, maomp nouroup i konámp ninik nomp ninik mek tokwae kari akwap námpan nkea mér mwanámpon.

¹³ Ae te mokopono? Nomo Kwarént koumpá yakáp nánko, tá nopok Kwaro kor nomont koumpá yak námp fwap mér mwanámp nie? Nomwan wae-man námokuráp Yiki Kor Spirit sáp tari námpara, wae mér námpon. ☆ ¹⁴ Naropwar Kwaro, apárokamp aropan warko ponankor éréképaeriaka, náráp Táráp sámp-kérép námp, yino wae nke námpan, yino am kar farákáp konámpon. ☆ ¹⁵ Tá arop ankwapao 'Jisas te Kwaromp Tárápono'rá sénánko te, Kwaro am aropént koumpá yak nánko, tá am aropao kor Kwarént koumpá yak námpon. ¹⁶ Aenámpara, Kwaro nomwan aropompi námpan, nomo am táman mér námpon.

Kwar námoku te ankár aropan aropomp i konámp fi korara, aropao kor ankwapan aropompnámp arop te, Kwarént koumpá yak nánko, te nopok Kwaro kor am aropént yak námpon. ☆ 17 Kristen ankwapyaenápén nouroup i konap ninik nomp ninik mek tokwae kari yak námp te ará: Nomo oukoumwan apárok mapek yakáp námp fek waeman Kraís niamp pourouráp yakápi námpara, nánkár wakmwaek kot mwanap yae tokwae fek te, nomo apáp mo, fwaponó. 18 Kwaro nomwan nouroup kwapwe námpara, nomo apáp mono. Am te apaerianápe, am nouroup kwapwe te apáp ninik yéréperá kérép konámpon. Aeno apápnámp fi kor te ará: Arop námokuráp kwatae ninik fek touwe sámp naenámpan ninikrianámpon. Táte arop apáp námp te, maomp arop nouroup i konámp ninik te maomp ninik mek tokwae kari yak mo námpan mér mwanámpon.

19 Am te Kwaromékir nomwan nouroup kare námpara, am fek táman nomp Kristen ankwapyaenápén nouroup námpon. ☆ 20 Tá arop ankwapao ‘Ono Kwarén nouroup kare nampono’rá sénámpao maok, tá warko ankwapnápén kokwarok námp te, maomp kar te kwekár námpon. Arop énéki tapokwapá yakáprá wae yi fek nke námpan man kokwarok námp te, mao yi fek nke monámp Kwarén te mokopia nouroup naenámpon? 21 Nomo Kraísomp lo sámp námp te aráno: Arop Kwarén nouroup námp te ankár taknámp náráp ankwapyaenápén kor

nouroup kuno. ☆

5

Kwarén mérnáp arop apárokamp kwatae ninikan kwe-pwar konap kar

¹ Arop ponankor Jisas te Kraisonorá mér nap te, am fárákap te Kwaromp tárápu yakáp napon. Arop ponankor naropwar ankárankan nouroup nap te, ankár maomp tárápuan kor nouroup i konapon.

² Nomo Kwarén nouroup kareria, nomo maomp loaok tukup námp te, nomo wae mér námpon: Am ninik fek táman maok, nomo Kwaromp tárápuan kor nouroup kare námpon. ³ Nomo Kwaromp lo karaok saráp paokop námp te, am támao yénképrá: Nomo waeman Kwarén nouroup kare námpon. Aenámpara, am lo te nomwan kour-sir naenámppourou mono, fwap ampaok paokop mwanámpon.

☆ ⁴ Arop ponankor Kwaromp tárápu yakáp nap te apárokamp kwatae ninik te kwe-sir konapon. Nomo waeman Kwarén mér námpara, am fek táman apárokamp kwatae ninik te yorowaria kwe-pwarará apárok sámp-anámppon. ☆ ⁵ Wa apárokamp ninikan kwe-pwar konámpon? Arop Jisasén Kwaromp Táráponoria mérnámppon arop támao kwe-pwar konámpon. ☆

Kwaro Jisasoinámppon ninikan érik sénámppon kar

⁶ Jisas Krais ékámppon te, ént mek anámpeaka maok, tá yaopwae porokopramp fek námokuráp yirirao ouppouroup naenámppria ékámppon. Mao te ént mek anámppon konap ninik fek saráp ék mono.

☆ **4:21:** Mt 5:44-45; Mk 12:29-31 ☆ **5:3:** Mt 11:30; Jo 14:15,23-24

☆ **5:4:** Jo 16:33 ☆ **5:5:** Ro 8:37

Ént ntia yiriramp n̄nik fek ékámpon. Yiki Kor Spirit mao te kare kar sér i konámp fi korara, mao kuri am Jisas Kraisoí námp táman farákáp námpón. ☆ ⁷ Waeman yininkaopwerao maói námp farákáprá sénaponó. ☆ ⁸ Yiki Kor Spiritao sénámp kar, éntao sénámp kar, yirirao sénámp kar, am yininkaopweramp kar máte ankáránkamp pourouráp kar sénaponó. ⁹ Arop kotriaka am kar fi sénapo, wawia kareno ri konámpan maok, Kwaro sénámp kar te aropamp karan kámákár akwap námpón. Am kar Kwaro farákáprá sénámp te mao náráp Tárápao tére námpán nomwan sénámpon. ☆ ¹⁰ Arop Kwaromp Tárápan mér námp te, waeman am Kwaro farákápnámp kar sámpeanánko, maomp n̄nik mek yak konámpono. Aeno arop Kwarén mér mo námp te, Kwar námokuráp Tárápao térenámp kar kare farákáp námpán kor mér mo námpón. Am tak námp támao mér naenámp kwe-sinámpara, am arop te 'Kwar te kwekár sér i konámp arop'rá sénámp niampon. ☆ ¹¹ Mámá kare kar kar Kwaro farákáp námp te ará: Kwaro nomwan yiki yakáp mwanámp sámp námpón. Am yiki yak fi te Kwaromp Tárápamp pourouk yak námpón. ¹² Arop Kwaromp Tárápént saráp koumpá yakáp nap te, waeman am yiki yak sámp námpóno. Aeno arop Kwaromp Tárápént koumpá yakáp mo nap te, am yiki yak te mono. ☆

Nomo te wae yiki yak sámp námp rá mér mwanámp kar

☆ **5:6:** Jo 1:29-34 ☆ **5:7:** Jo 15:26 ☆ **5:9:** Jo 5:32-37; 8:18

☆ **5:10:** Ga 4:6 ☆ **5:12:** Jo 3:36

13 Yumo Kwaromp Táráp Jisasén mérap te, yumo wae yiki yak kwapwe sámp nap, am fwapia mér mwanapria, yumwan má kar kumwia kérép nampono. ☆ 14 Kwaro nomwan yaewour naeria warákár námpara, nomo apáp mono, maomp wonae fik tukupria, mao waeman námoku sánk naeria nánapnámp ninik mek sénánko te, tá fwap nomp kar wa naerámpon. ☆ 15 Nomo wae mér námpon: Nomo man kar toropwap námp te, mao wae wawi konámpon. Ae konámpara, nomo am táman wae méria, nomo man ‘Ankwap ankank sápa’ ria sénámp te, nomo am ankank te wae sáp konámp mér námpon.

16 Aropao náráp ankwapyaenápen nke nángo, maomp waemp fwap warko Kwaromp wonae fik korop naenámpao, kwatae ninik fek akwap nángo te, Kwarén sénánko, Kwaro am aropan yiki yak naenámp sánk naenámpmon. Ono te am sumpwi pap mo i konámp pourouráp kwatae ninikan sénampono. Arop ankwap maomp waemp warko Kwaromp wonae fik akwap naenámp pourou monámp kwatae ninik nángo te, ono yumwan ‘Kwarén “Maomp kwatae ninik sámp-sirae”rá sér kip’rá sér mono. ☆ 17 Ponankor ninik yae-párak mo námp te, am te kwatae ninikono. Aenámpan maok, ankwap pourouráp kwatae niniki tenánko, fwap Kwaro sámp-sir konámpani námp te, maomp waemp fwap Kwaromp wonae fik yak naenámpmon.

18 Nomo wae mér námpon: Arop ponankor Kwaromp tárápu yakáp nap te, warko kwatae

ninik i konap ninikaok saráp yakáp mo i konapon. Waeman Kwaromp tárápao man taokeyak námpara, Satan te am aropamp pourouk yae pap mono. ☆

¹⁹ Satan te mámá apár poukeyak nánko, ponankor maomp yae ankore mek yakáp napo, nomo te mwar Kwaromp tárápu yakáp námp te, nomo wae mér námpon.

²⁰ Nomo wae mérámpon: Kwaromp Táráp waeman ék námpara, mao nomwan ninik sáp nánko, nomo fwap Kwar kare mérria waeman Kwar kare ntia maomp Táráp Jisas Kraisént yakáp námpon. Am Kwar te karenono. Tá mao te yiki yaká yak fi kor támaono. ☆

²¹ Onomp tárápu, ankwap ankankao yiráp kwar niamp yak naeane. Ankár younkwe sánk kipo. ☆

Kwaromp Kwapwe Kare Kar
The New Testament in the Karkar-Yuri Language of
Papua New Guinea
Nupela Testamen long tokples Karkar-Yuri long
Niugini

Copyright © Wycliffe Bible Translators, Inc.

Language: Karkar-Yuri

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-01-09

PDF generated using Haiola and XeLaTeX on 11 Nov 2022 from source files dated 9 Oct 2020

7103f8db-88c2-5fec-8ac4-0edfac04e885